



Sud Bosne i Hercegovine
Суд Босне и Херцеговине

Broj: S1 3 Iž 042998 22 Iž
Sarajevo, 10.06.2022.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Dinke Bešlagić-Čovrk kao predsjednika vijeća, Zvezdane Antonović i Mirka Božovića kao članova vijeća, odlučujući o žalbi političke stranke Bosanska narodna stranka-B.N.S.-V.N.D, koju zastupa predsjednik stranke Sanin Musa, sa sjedištem u Sarajevu-Ilidža, ulica Dr.Silve Rizvanbegović 15, izjavljenoj protiv Odluke Centralne izborne komisije Bosne i Hercegovine, broj: 06-1-07-3 1221/22 od 03.06.2022 godine u nejavnoj sjednici, održanoj dana 10.06.2022.godine, donio je

R J E Š E N J E

Žalba se odbija kao neosnovana.

O b r a z l o ž e n j e

Odlukom Centralne izborne komisije Bosne i Hercegovine, broj 06-1-07-3-1221/22 od 03.06.2022.godine, odbijena je prijava ovjeru političke stranke, BOSANSKA NARODNA STRANKA B.N.S.-V.N.D., šifra stranke (03065) za učešće na Općim izborima 2022.godine, za izbore za Predstavnički dom Parlamenta Federacije BiH, Skupštinu Kantona 1, Skupštinu Kantona 3, Skupštinu Kantona 4, Skupštinu Kantona 6 i Skupštinu Kantona 9.

Na navedenu odluku žalitelj je izjavio žabu navodeći da priznaje da je stranka napravila određene propuste koji su doveli do toga da Centralna izborna komisija BiH odbije njihovu prijavu za učešće na Općim izborima 2022.godine. Navodi da je stranka skupila dovoljan broj potpisa podrške, kao i da je uplatila taksu od 18.000,00 KM. Dalje navodi da je problem u dostavljanju tromjesečnog finansijskog izvještaja jer se lice koje vodi knjigovodstvo nalazilo na bolničkom liječenju, iz kojeg razloga nije urađen izvještaj. Rokove u kojima je trebalo ispraviti nedostatke su propustili prije svega zbog neiskustva stranke, a da će tražene nedostatke dostaviti naknadno. Predlaže da se žalba uvaži.

Centralna izborna komisija Bosne i Hercegovine u odgovoru na žalbu predložila da se ista odbije kao neosnovana.

Žalba nije dopuštena.

Prema shvatanju apelacionog vijeća, pobijana odluka Centralne izborne komisije Bosne i Hercegovine (u daljem tekstu CIK BiH) broj: 06-1-07-3-1221/22 od 03.06.2022.godine je zasnovana na pravilnoj primjeni materijalnog prava, a razloge za donošenje iste u cjelosti prihvata i ovo vijeće.

Iz stanja spisa proizlazi da je CIK BiH u postupku provjere prijave žalitelja kao političke stranke, za učešće na Općim izborima 2022.godine, za izbore za Predstavnički dom Parlamenta Federacije BiH, Skupštinu Kantona 1, Skupštinu Kantona 3, Skupštinu Kantona 4, Skupštinu Kantona 6 i Skupštinu Kantona 9, utvrdila da prijava sadrži slijedeće nedostatke i nepravilnosti: nije dostavljen predizborni finansijski izvještaj elektronskim putem, nije dostavljen dovoljan broj validnih potpisa podrške za organe vlasti za koje je podnesena prijava, te da nije promijenjen naziv stranke koji će koristiti u izborne svrhe.

Naime, CIK BiH je Odlukom broj 06-1-07-3-1221/22 od 27.05.2022.godine u postupku provjere utvrdila da politička stranka Bosanska narodna stranka „BNS“ima pravo da u izborne svrhe na Općim izborima 2020.godine koristi taj naziv jer je registrovana kod Općinskog suda Goražde 2018.godine. Drugim stavom odluke je utvrđeno da politička stranka Bosanska narodna stranka B.N.S.-V.N.D. nema pravo koristiti taj naziv u izborne svrhe pod kojim je podnijela prijavu, obzirom da je upisana u registar političkih organizacija kod Općinskog suda Sarajevo dana 01.06.2021.godine, pa radi o nazivima stranaka koji su slični u tolikoj mjeri da bi mogli zbuniti birača ili ga dovesti u zabludu Stavom 3. je naloženo političkoj stranci koja je kasnije upisana u registar da izmijeni naziv koji će koristiti u izborne svrhe.

CIK BiH je žalitelju elektronskim putem dana 27.05.2022.godine dostavila obavijest da u roku od dva dana od prijema iste, a najkasnije do 30.05.2022.godine do 16:00 sati, otkloni uočene nedostatke u prijavi na način što će dostaviti :1. dovoljan broj validnih potpisa za organ vlasti za koji je podnesena prijava političke stranke i to za nivo vlasti Zastupnički/Predstavnički dom Parlamenta Federacije BiH obzirom da je od dostavljenih potpisa podrške 3.031, prihvaćeno kao validni 2.747 glasova te stoga nedostaje još 253 validna potpisa podrške, 2. da dostavi izmijenjen naziv koji će politička stranka koristiti u izborne svrhe i 3. da dostavi predizborni finansijski izvještaj putem aplikacije CIK BiH.

Odredba člana 4.11 stav 5. tačka 1. Izbornog zakona BiH propisuje obavezu političkih stranaka ili nezavisnih kandidata za ovjeru učešća za izbore, da podnesu u prijavi propisani broj potpisa podrške birača iz člana 4.4 ovog zakona. Iz stanja spisa proizlazi da ovaj nedostatak nije u zakonom ostavljenom roku otklonjen.

Odredba člana 4.7 Izbornog zakona BiH propisuje da ako dvije političke stranke ili koalicije ili dvije liste nezavisnih kandidata imaju identične nazive ili nazive koji su slični u tolikoj mjeri da bi mogli zbuniti glasača ili ga dovesti u zabludu, CIK BiH utvrđuje koja od političkih stranaka ima pravo da koristi taj naziv u izborne svrhe, vodeći računa o datumu kada se svaka stranka registrovala kod nadležnog organa. Iz stanja spisa proizlazi, a što i sam žalitelj neosporava, da u ostavljenom roku nije izvršena promjena naziva političke stranke koji će se koristiti u izborne

svrhe. Također nije sporno da žalitelj uz prijavu nije dostavio ni predizborni finansijski izvještaj preko aplikacije CIK BiH koji je obavezan element pravilne i potpune prijave.

Kako stanje spisa ukazuje da žalitelj nije uz prijavu priložio svu neophodnu dokumentaciju u zakonom propisanom roku, to je CIK BiH, po shvatanju apelacionog vijeća, pravilno odbila ovjeru prijavu političke stranke, BOSANSKA NARODNA STRANKA B.N.S.-V.N.D., šifra stranke (03065) za učešće na Općim izborima 2022.godine, za izbore za Predstavnički dom Parlamenta Federacije BiH, Skupštinu Kantona 1, Skupštinu Kantona 3, Skupštinu Kantona 4, Skupštinu Kantona 6 i Skupštinu Kantona 9. Na pravilnost i zakonitost pobijane odluke ne utiču žalbeni navodi jer su dati paušalno.

Iz navedenih razloga apelaciono vijeće nalazi da je pobijana odluka CIK BiH pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
S U D I J A**

Dinka Bešlagić-Čovrk